

AWE Mainta

Januari 14, 2019

www.awemainta.com
www.facebook.com/awemainta
noticia@awemainta.com
 583-1400

CASO IBIS DESPUES DI 2 AÑA Y MEI FINALMENTE DEN CORTE

Pagina 2

DIRIGENTENAN DI ARUBA SU CARNAVAL



Pg. 15

= exact

Solutions for Finance, Manufacturing,
Wholesale Distribution, Professional
Services, HRM, CRM and BPM

Business Processes

Marketing, Sales and Service
Logistics & Supply Chain Management
Reporting & Compliance
Planning & Production
Finance & Accounting
Project Management

Supporting all
your business activities

Our goal is to understand and anticipate your business
requirements. It means that everything we do is
geared towards equipping you with solutions that
will help you succeed as markets evolve

VCC
International NV

Exact. And it all comes together. Tel: 583-7072 | info@vcc.int.com | www.vcc-int.com

Cu e anuncio cu Ezzard Cilie su contrato lo no wordo prolonga

HOH CU SU TEAM NEGOCIADOR NOBO, POR TIN FIRMAMENTÓ DI UN PROTOCOL AWE

Pagina 7

Te ainda

FTA no por firma un CAO cu Excelsior Casino

FOR di basta tempo caba, FTA a bin ta negocia cu gerencia di Excelsior Casino, cu ta keda den Holiday Inn Hotel, sin por concretisa algo. Di acuerdo cu abogado Hose Figaroa, t'asina cu un dado momento e trahadornan a trata na afilia na un otro sindicato, pero tur a bolbe na FTA, pero asina mes, e problema mas grandi a bira e pago di bonus di fin di aña.

E trahadornan aki no a haya bonus di fin di 2017, tampoco di 2018, pero parcialmente a haci un pago n'e trahadornan. Pesey tin negociacion ainda andando pa wak con por yega na un CAO, cu su beneficianan, pero te ainda nada. FTA kier mas pronto posibel na bienestar di e trahaornan concretisa un CAO.

Mester bisa cu Holiday Inn Hotel mes no tin nada di bisa den operacion di e casino, cu ta den man di



otro operador, maske e permiso ta di e hotel.

Pesey FTA ta reuniendo cu e operador di e casino, sperando cu den e proximo reunion, lo wak si por tin algo riba papel, pasobra no tin un CAO

vigente y pa bay dilanti, lo mester tin un palabracion mas concreto, segun abogado Hose Figaroa.

Maska cu e casino su operador ta bin ta bisa cu nan no ta gana placa manera hopi hende ta kere.

Di acuerdo cu FTA

Trahadornan di Tony Romas, a haya na pago, pero no manera nan merece

TONY ROMA'S
RIBS • SEAFOOD • STEAKS

E famoso restaurant Tony Romas a dicidi di sera e negoshi di un dia pa otro, sin a haya permiso di Departamento di Trabao.

E hecho aki a causa basta friccion entre e trahadornan y doño di e

restaurant, cu por bisa cu e ta algo similar na loke ta pasando aworaki na La Linda.

Segun abogado di FTA, Hose Figaroa, a negocia cu gerencia di Tony Romas, loke no tabata facil, pero na final a logra tog p'e trahadornan haya pago pa nan añanan di servicio, pero e no tabata un pago cu idealmente nan a merece.

N'e momento ey Tony Romas no tabatin nada mas, esta bien cu p.e. FTA lo por a pone beslag ariba pa haya tog algo adicional p'e trahadornan, pero nada. Gana un caso hudicial ta algo, pero haya e placa ta otro cos.

E trahadornan a recibí tog algun pago y asina a finalisa nan relacion di trabao.

Caso IBIS despues di 2 aña y mei finalmente den Corte

DESPUES di 400 compania cu OM a cuminsa e investigacion IBIS cun'e, awe 14 di januari 16 compania lo presenta dilanti Hues Gruyters na Corte di Aruba. Despues di 2 huiszoeking uno na maart 2017 y otro dia 21 di augustus 2017, exactamente un luna prome cu eleccion, dialuna lo presenta y duna cuenta na hues y mira si enberdad tawatin dunament'i placa pa haya ontheffing of ta un storia fabrica pa perhudica henter un Gobernacion di un pais. E por zona asta manera un conspiracion estilo pelicula, di e forma con Ministerio publico a pinte di e prome momentonan. A referi na Paul Croes como e "Big fish" y cu lo ta un "grootschalig corruptie schandaal". Despues di 2 aña y 6 luna cu Ministerio Publico a inicia un investigacion contra ex Minister di Asuntonan Social y Labor drs. Paul Croes, finalmente e caso aki lo inicia awe 14 di Januari.

Un caso hopi comenta y cu a conmove comunidad pa e forma con Ministerio Publico a presenta y ehecuto e caso aki. Tawata parece mas bien un demostracion di poder y hasta un show monta pa esnan di oposicion, como cu tawata den aña di pleno eleccion. A haci 13 entrada hudicial cu mas di 100 cuerpo di husticia riba pia. Un accion a la cartel. Algo nunca bisto den nos sistema politico na unda poder hudicial ta interferi cu e poder ehecutivo.

Por corda ainda cu a drenta dos bes na e cas di e ex-Minister den oranan trempan di mainta cu hopi agente hudicial y tambe cu cachonan pa busca droga, arma of placa. Tambe OM a inicia e investigacion aki cu mas di 400 compania cu lo a ricibi mas di 1900 dispensacion (ontheffing) pa e mercado laboral di Aruba entre 2014 - 2017. Un caso cu a wordo describi como un caso multi misionario. Despues a bay over na encarcela Croes un luna prome cu eleccion pa 86 dia den isolacion (beperking) sin contacto cu famia of cualkier persona cu no tabata su abogado. Croes a wordo encarcela pa 22 ora pa dia den un cel, tur esaki pa motibo di e investigacion, segun OM. 86 dia cera sin un condena.

Awe Dialuna pa prome bes e acusado Croes hunto cu algun otro sospechoso pa prome bez lo cuminsa defende nan mes. Manera nos por a compronde e caso a bira hopi mas chikito cu OM a premira caba. Ta trata di mas o menos 15 compania cu a resta den e caso pa sumanan chikito y tambe cahanan di cerbes. Declaracionnan den prensa di parti OM na inicio di e caso tabata papia di un caso hopi grandi di sumanan cuantioso y hopi compania.

Nos lo sigui e caso aki sigur di cerca pa asina finalmente por saca un conclusion di henter e caso hopi particular aki pa mira si enberdad tawatin corrupcion na gran escala of ta un machtsmisbruik (abuso di poder) di parti Misterio publico.

Hoben a wordo hinca den bariga

DIASABRA algo prome 12'or mey anochi, polis a wordo informa di un pelea formal na Harbour Arena unda eleccion di Prins cu Pancho a tuma luga. Mesora varios patruya a cuminsa bay e sitio. Na nan yegada, tawata net ora e evento di Carnaval 65 a caba y tawata tin un multitud di henda saliendo.

Asina mes, den algun minuut cu nan a yega nan a wordo informa cu un hoben a wordo hinca cu un boter kibra. E boter lo a hinke den bariga banda drechi, y mesora algun hende eybanda a pone sinta. Polis mesora a pidi pa un ambulance. Na mes momento nan ta detene e hoben cu lo a comete e acto serio aki. Ela ser hinca den patruya, mientras transportwagen tawata na caminda. Despues di algun minuut ambulance

tambe a yega y prepara e hoben herida pa hospital.

Segun informacionnan ricibi e dos hobennan aki for di oranan mas trempan di anochi tawata tin problema cu otro. Personal di seguridad di e evento a hala nan atencion, cu si nan no comporta nan lo wordo saca afo.

Aparentemente nan a para keto pa e ora ey, y manera e evento di Prins cu Pancho a caba lo a start un bringamento formal na salida. E momento ey un di e hobennan a pasa man pa un boter kibra y hinca e otro hoben den su abdomen banda drechi.

Casonan asina ta sumamente lamentabel, caminda dos hoben ta bringa y cos ta bay asina leu di hinca otro. Ta algo cu por a termina fatal tambe.





BANCO di Seguro Social (SVb) a anuncia cu desde 1 di februari lo no paga Reparatiatoeslag mas na pensionadonan cu tin un entrada mas halto cu e pensioen basico di SVb. “Hopi pensionado cu tin un pensioen chikito adicional, por ehempel di LAGO of di Hospital, cu hopi biaha no ta mas cu 250 florin riba nan pensioen di SVb, ta perde nan reparatiatoeslag di 125 florin”, asina Parlamentario mr. drs. Richard Arends (AVP) a splica. Pareu cu a introduci e crisisheffing pa cubri e gastonan adicional di e Gobierno aki, a elimina e reparatiatoeslag pa un grupo grandi di pensionado.

“Partido AVP a bin ta adverti esaki y a tene varios reunion informativo pa alerta comunidad, pero Gobierno a nenga enfaticamente cu e pensionadonan lo bay atras”, segun Richard Arends. “Te ainda durante tratamiento di presupuesto y reforma fiscal na final di año a bolbe haci pregunta riba e reparatiatoeslag pero Gobierno a evadi contesta”.

Na momento cu lider di fraccion di AVP a puntra si pensionadonan lo bay atras, Prome Minister a bisa enfaticamente cu esey no ta e caso y a

Ora a aumenta BBO a kita reparatiatoeslag for di mas di 10,000 pensionado

hasta cuestiona capacidad di fraccion di AVP pa compronde textonan legal. “E ley pa introduci e crisisheffing ta papia bon cla cu e pensionado cu tin un entrada mas halto cu e pensioen di SVb, lo no bin mas na remarca pa e reparatiatoeslag”, Parlamentario Arends a indica.

A introduci Reparatiatoeslag na año 2012 como producto di e Dialogo Social. Su meta a sirbi hustamente pa brinda alivio na esunnan mas vulnerable y recupera nan perdida di poder di compra. Awe e pensionado mes lo paga e compensacion cu Gobierno a anuncia den forma di e reduccion di e prima di AZV y ta wordo azota un biaha mas door di efectonan di e medidadnan cu Gobierno a impone prome cu fin di año.

“Nos ta lamenta esaki profundamente,” Parlamentario Richard Arends (AVP) a declara. “Specialmente si bo mira cu fraccion di AVP di manera constructivo a prepara un amienda pa evita esaki, pero a wordo rechasa door di partidonan den coalicion. Hunto cu introduccion di e crisisheffing, Gobierno e elimina e reparatiatoeslag di mas di 10,000 pensionado”.

Mientras cu Gobierno a bisa cu supuestamente tur hende ta bay dilanti den nan entrada, comunidad mester carga un peso di 270 milyon florin, specialmente esunnan di mas vulnerable.

Gobierno nunca a bin cu un compensacion adecuado pa empleadonan den sector priva, pa ambtenaarnan, pa esunnan cu ta biba di bijstand y tampoco pa empresanan chikito. Mientras cu ta hiba un asina yama “maneho” unda cu e ser humano lo ta central, a kita reparatiatoeslag for di miles di pensionado. E pensionado cu un entrada te cu 2500 florin lo ta bou di e impresion di bay dilanti cu 100 florin pa motibo di reduccion di e prima di AZV, pero na mes momento e ta perde su reparatiatoeslag di 100 florin.

“Ta indignante pa constata cu e pensionado mes lo paga pa su reduccion di prima di AZV, cu tanto Gobierno a priminti, cu eliminacion di su reparatiatoeslag”, asina Parlamentario Richard Arends a splica.

Amendement no. 3
Fractie A.V.P.

STATEN VAN ARUBA
STEMMING
(compensatie crisisheffing en andere fiscale maatregelen)
AGENDAPUNT: 15.03.17-18.01.18 (2017-2018-2019)

VERGADERING NO: 16 D.D. 22 mei 2018

	VOOR	TEGEN
1. mr. J.E. Thijsen		✓
2. L.J. Christiaans-Yarzagaray, M.Sc.		✓
3. E.J. H. Croes		✓
4. D.R.Y. Lejuez		✓
5. S.S.J. Ras		✓
6. H.W.G. Tevreden, B.Sc.		✓
7. R.G. Tjon, MBA		✓
8. drs. S.M. Tromp-Lee, B.Ec.		✓
9. E.G.A. Vrolijk, J.L.B.		✓
10. mr. drs. R.A. Arends	✓	
11. J.J. Arends-Reyes, B.Ed.	✓	
12. R.J. Candelaria	✓	
13. mr. drs. A.L. Dowers	✓	
14. M.B. Lampe	✓	
15. ing. M.E. de Meza	✓	
16. O.B. Sevinger	✓	
17. A.M. Sneek	✓	
18. drs. M.G. Wyatt-Ras	✓	
19. A.A. Howell		✓
20. drs. M.J. Lopez-Tromp		✓
21. R.S. Croes		✓
UITSLAG STEMMING	VOOR: 9	TEGEN: 12

HOOFDELIJKE STEMMING: Met 9 stemmen voor en 12 stemmen tegen wordt amendement no. 3 verworpen.

IPKO ta conclui:

Situacion na Venezuela mester sigui haya atencion

E edicion di winter di IPKO (Consulta Interparlamentario di Relacionnan di Reino) a clausura cu firmamento di un lista di palabracion. E lider di e delegacionnan di Corsou, Aruba, Sint Maarten y Hulanda, a firma e convenio.

Situacion na Venezuela

Durante di e consulta, e delegacionnan a intercambia intensivamente tocante dje ola di migrante di refugiado y migrante Venezolano, cu principalmente Aruba y Corsou ta confronta. Pa St.Maarten, e ta birando tambe un problema pa motibo dje migracion via e parti Frances di St.Maarten.

E delegacionnan ta di acuerdo cu e problematica ta existi tension continuamente y cu ta e punto di preocupacion pa e Parlamentarionan, di cada ún di e cuater paisnan den Reino.

E ola di migracion tin consecuencia serio riba tereno social y financiero pa e paisnan Caribense miembro di Reino. Pero tambe e imagen internacional dje paisnan ta influencia debi na e.o. raportahenan preocupante di organisacionnan di derechonan humano. E delegacionnan ta haya hopi importante cu gobierno dje cuater paisnan den Reino mester keda den consulta pa sigui busca solucion pa e problemanan cu ta consecuencia di e ola di refugiado y migrantenan for di Venezuela.

Pa por eherce nan tarea di control como representantenan di pueblo, e cuater delegacionnan, ke informa otro mas regular tocante dje situacion den nan pais, e posibel solucionnan cu ta evalua y tocante dje proposicionnan pa peticion concreto di nan Gobiernonan.

Tambe e delegashonnan ta indica cu nan ta desea pa dispone di informacion cu por ilustra e diferente aspectonan dje problematica aki.

Emocion

Tur e lidernan a reconoce cu durante dje último dianan, tin biha e emocionnan a subi. Presidente di Staten di Corsou, William Millerson a expresa e deseo cu durante dje proximo IPKO lo tin mas comprension pa otro y logra miho resultado.

Rocco Tjon (Aruba) a indica cu no obstante e diferencianan e por mira bek riba un IPKO fructifero. Lider di e delegacion Hulandes, Jan Paternotte a bisa cu ela mira 'olanan alto'. Mientras cu den e debatenan plenario tabatin hopi confrontacion. Segun Paternotte, den e gruponan chikíto informal, tabatin a hiba bon combersacion.

Presidente di Staten di St.Maarten, Sarah Wescot-Williams a experencia e debatenan como hectic, pero ela gosa dje e encuentronan placentero pafó di e sala di reunion. Tur delegacion a elogia e manera cu Wescot-Williams, a presidi e IPKO.

Na juni proximo, e delegacionnan ta reuni atrobe na Den Haag.



Take your business to the

NEXT LEVEL



Saturday, January 19, 2019 | 9am - 2pm

ARUBA CHAMBER OF COMMERCE & INDUSTRY | ADMISSION: FREE!

Registration in advance is required to attend the presentations.
 Register: www.arubachamber.com/signup | 582-1566 ext. 27/35/42.
www.arubachamber.com | www.facebook.com/arubachamber




Tata dilanti mesa berde pa maltrata yiunan durante 8 año largo



UN caso hopi emocional a wordo trata diabierna mainta den Corte unda cu e acusado tabata e homber Alexander M., acusa di maltrato físico na su dos yiunan pero tambe di a comete actonan inmoral cu dos sobrina, ora cu esakinan tabata menor.

E caso aki no tabata uno difícil pasobra e acusado a admiti practicamente tur cos, cu excepcion di e di dos menor cu e lo a mishi cu su pechonan.

E homber ta biba pa hopi año caba na Aruba, ta papia Papiamentu y tabata casa cu un Arubiano, y tin dos yiu. Hues a cuminsa pa puntr'e kico e ta pensa di e prome acusacion. E ta wordo acusa di a maltrata su dos yiunan den e periodo di juni 2009 pa april 2018 dor di maltrata nan cu mokete y/of armanan (faha, taki di mata y/of slof). "Ta berdad," el a bisa. "Pero mi no a haci pa "hurt" nan, pero pa coregi nan y pone disciplina riba nan," el a bisa Hues. E Magistrado a contest'e cu e yiunan tin otro version. E mama ta bisa cu e maltrato ta exagera pasobra un biaha hasta e yiu a haya lesion cu a cuminsa sangra.

Den e caso di inmoralidad, e prome sobrina ta bisa cu e acusado a mishi cun'e ora cu e tabatin 4 año y algun otro biaha mas. Pero e homber ta keda insisti cu tabata solamente e biaha na Venezuela y aki na Aruba nada no a pasa.

Ni ora cu e mucha muhe a drenta su camber y kita su paña. Y e biaha cu e cos a sosode, e ta bisa ta e mucha a mishi cun'e prome. Pero e Magistrado ta haya esaki straño, cu e acto ta tuma lugha unda tin mas hende. Ta como si fuera cu e ta cumbra di hacie caba y e mucha no a haya esey straño.

Hues a puntr'e tambe si e tin contacto cu su famia, el a bisa cu no. E ta corda si e fecha di 9 di october, cu el a sinti un alegría grandi ora cu su yiu a bin bishit'e. Contando e storia aki el a cuminsa yora, pasobra el a constata cu su yiunan no kier mir'e mas. Hasta e yiu homber lo a menas'e cu morto, esta cu e lo mat'e of laga mat'e, pa cual ta miho e bay for di Aruba ora cu e sali.

Fiscal a cuminsa pa splica e acusado cu loke el a haci cu e muchanana, e maltrato, no por wordo considera algo correctivo. Y ta hechonan cu a tuma lugha durante 8 año largo. Yiunan mester wordo educa y protege nan, y no maltrata nan. Den e casonan di inmoralidad, cu semper ta difícil y sensibel, pasobra hopi biaha no tin prueba. Y den e caso aki tambe e ta un tiki difícil. Un di denunciante nan ta bisa cu durante 8 año largo e acusado a mishi cun'e y hasta a purba penetr'e, pero door cu el a cuminsa yora esaki no a sosode. E mishimento a sigui y sigui, for di 4 año te rond su 12 pa 13 año. Aunke cu e acusado ta nenga, Fiscal ta kere cu e acusacion aki tambe ta proba. Igualmente ta conta pa e otro caso.

Apesar cu e hechonan aki a tuma lugha basta tempo pasa, e no ta motibo pa dun'e un castigo menor. El a pidi Hues pa impone un castigo di 30 luna incondicional.

Su Abogado mr. Lejuez ta haya e caso aki uno poco straño y dudoso. El a lesa tur cos y ta kere cu e cos aki ta parece algo planea. Esaki principalment pasobra tur e denunciante nan contra su cliente, a tuma lugha tras di otro, esta e maltrato y e casonan di inmoralidad. Y esey a sosode net den e periodo cu e pareha tabata pasando den proceso di divorcio.

E Abogado ta sinti cu e mama ta manipula e muchanan y asina e denunciante nan aki a bini dilanti.

P'esey e ta conclui cu no e prome acusacion no ta proba y e otro acusacionnan no tin prueba di sosten, manera ley ta exige. Lesa e declaracionnan, el a bisa. E mama ta esun cu a bay puntra e otro denunciante nan "boso a wordo molestia door di Alexander" y no a puntra nan "boso a yega di wordo molestia". El a pidi Hues pa tene consideracion cu tur e aspectonan aki.

A cera tratamiento di e caso y dia prome di februari lo tin sentencia den e caso aki.

BO MESTER DI WASTE BUCKET RESIDENCIAL OF COMERCIAL?

ecotech aruba

YAMA

Mr. Bucket

594-3757
mrbucket@ecotech.aw

20 yrd Big Bucket

15 yrd Junior Bucket

10 yrd Small Bucket

Cu e anuncio cu Ezzard Cilie su contrato lo no wordo prolonga

HOH cu su team negociador nobo, por tin firmamento di un protocol awe

E negociacion entre Mediator di Gobierno, cu ABV, Hunta di Supervision di HOH y e Director Medico, Ezzard Cilie, ta yegando na un protocol, pasobra no tin mas tempo pa perde, y tin trabao pa haci.

Di acuerdo cu informacion recibi, t'asina cu Hunta di Supervision a duna di conoce cu e contrato cu Ezzard Cilie ta finalisa na fin di e aña aki, y lo no wordo prolonga. Loke nifica cu mester cuminsa cu e proceso pa busca un Director Medico nobo.

Cu participacion di e decision aki, por bisa cu e partidonan ta mas serca di otro. E preocupacion mas grandi awor p'e sindicato ta, pa yega na un CAO nobo, pasobra e bieu a expira for di basta tempo caba. Pero a mustra ABV cu nan no por keda demanda p'e Director Financiero, Theo de Kool tin cu bin bek.

A dicidi cu tin un periodo determina pa negocia un CAO nobo, cu a cuminsa for di aña pasa. Di parti di HOH, Ezzard Cilie lo keda encarga cu e negociacionnan, hunto cu su team negociador.

ABV a expresa nan preocupacion cu diferente di e personanan cu tabata na mesa di negociacion lo no tey mas, e.o. e Director Financiero y su suplente, pero den e reunion a keda garantiza cu tin hende capaz pa sigui cu e trabao aki, a percura pa sigui y finalisa e negociacion.

Tin mencion cu HOH lo a pidi e ex Director Financiero, Fernando Rigaud pa bin yuda finalisa e negociacion, siendo un conocedor di e materia aki tambe.

Ta di spera cu awe lo tin claridad y asina reanuda e reunion pa negocia e CAO cu ta pendiente. HOH lo mester tin su team negociador pa sigui y awe lo por haya sa con e team aki ta consisti, cu manera menciona cu e ex Director Financiero, Fernando Rigaud y su team. Aparentemente ABV lo por biba cu e pensamiento aki.

Si esaki t'e caso, awe e partidonan lo firma un protocol definitivo.



R
RENAISSANCE®
ARUBA RESORT & CASINO



Live to Discover, Work to Inspire

Explore the world even as you work.
A passion for discovery doesn't stop in the workplace.

We have the following position available:

Surveillance Agent

Some Responsibilities:

The Surveillance Agent observes all activities of guests and Team Members on the premises and the company assets, of the Renaissance Aruba Resort & Casino, the Renaissance Island, Convention Center, Starbucks and the Renaissance Mall and Market Place. Responsible for maintaining the highest level of confidentiality.

Required Skills:

Good problem solving skills and the ability to think and act quickly. Adequate computer skills and good knowledge of all surveillance equipment and cameras is required for the function; be able to view multiple screens. Have the ability to work under pressure and be able to handle stress. Self-motivated and assertive personality. Willingness to work during non-office hours.

Please hand in your application, CV, diplomas and other relevant documents to:

Human Resources Department
employment@arubarenaissance.com
L.G. Smith Boulevard 82, Oranjestad, Aruba
Telephone: 297-583-6000
www.renaruba.com

Renaissance Marketplace a haci entrega di fondonan recauda durante Winter Wonderland

Fondonan a bay pa Mary Joan Foundation y Stichting BOB



DEN luna di december ultimo Renaissance Marketplace tabata 'the place to be' y a ofrece Aruba un experiencia unico durante di su 'Winter Wonderland'. Grandi y chikito a disfruta di presentacionnan di Las Unidas, Robert y Su Solo Banda Show, Claudius Philips & OREO, Grupo di

Betico y otro agrupacionnan musical cu a compana e ambiente di fin di aña na Renaissance Marketplace.

Manera tur hende sa, e aña pasa e Ice Skating Rink tabatin un proposito masha special atrobe.

Mary Joan Foundation y Stichting BOB tabata encarga cu e maneho di e popular Ice Skating Rink y tur loke a wordo genera for di e.o huur di sapato a bay p'e fundacionnan. Di e manera aki Renaissance Marketplace a bolbe crea un parentesis den e dianan di fiesta y ta subraya nan compromiso cu e comunidad di Aruba.

Tabata diarazon merdia cu sra. Arabella Colina, Presidente di Mary Joan Foundation y sra. Diantha Nuesch di Stichting BOB a ricibi nan donacion for di ehecutivonan di Renaissance Marketplace.

DANKI ARUBA! A RECAUDA 8927.80 FLORIN TOTAL

Aruba a gosa di e nochinan di compra den e Winter Wonderland di Renaissance Marketplace. Danki na generosidad di tur cliente por a yuda ambos fundacion recauda fondo.

Mientras cu Stichting BOB lo tin bon uzo p'e fondonan den nan trabou di conscientisacion riba e importancia di un mammogram p'e muher Arubano, Mary Joan Foundation por sigui sostene tur paciente cu ta pasando den e trayecto dificil cu cancer na pecho ta trece cu'ne.

Ademas, nan lo uza parti di e donacion pa nan proyecto nobo

“Un peluca, Un Sonrisa”

, na unda ta traha peluca p'e pacien-
tenan.

Venezolano condena na 11 año pa 4 atraco arma

HUEZ no tabatin mester di tempo pa pensa riba e caso ya cu e pruebanan contra e Venezolano VL tabata contundente. E homber aki cu a bini Aruba y a comete diferente atraco, a wordo haya culpabel y condena na 11 año di prizon.

E Venezolano a wordo acusa di conhuntamente cu un otro of otronan, a comete ladronicia cu violencia den un supermarket riba 21 di maart 2018 bayendo cu placa y/of un tas di muher y/of un cadena di oro cu tabata pertenece na un y/of tres persona. E violencia a encera cu V.L. y e otronan a drenta e supermarket cu cara tapa y arma di candela y a pone arma riba curpa di un di e personanan y a bise: "Duna mi e placa".

Tambe e ta wordo acusa di a pone arma riba un otro persona y a ranca su tas, cadena y cu a pone arma riba pecho di e di tres persona y a bise: "Bo move mi ta mata bo".

E ta wordo acusa di, conhuntamente cu un otro of otronan, ladronicia cu violencia den un supermercado riba 23 di maart 2018 di cen cu tabata pertenece na un y/of dos persona. E violencia a encera V.L. a drenta e supermarket cu cara tapa y arma di candela den man y a punta e arma riba e personanan den e tienda.

V.L. ta wordo acusa di posesion di arma di candela riba 21 di maart 2018 y 23 di maart 2018 y 14 di mei 2018.

Ademas V.L. ta wordo acusa, conhuntamente cu un otro of otronan, ladronicia cu violencia riba 14 di mei 2018 di un tas cu telefon y un boshi di yabi cu tabata pertenece na un y/of tres persona. E violencia a encera cu a menaza e personanan cu arma y/of a pusha e arma cu forza contra pecho di un di nan y/of a dal e varios biaha cu e cabo di e arma na su cabez y/of a tene un otro persona cu forza y a oblige pa drumi abao y/of a tene e arma na cabez di e di tres persona.

E tabata un di e personanan cu tabata envolvi den un serie di atraco cu tabata tuma luga na momento cu tambe tabata comete un cantidad di ladronicia riba turistanan of sitio unda turistanan tabata hospeda.

Fiscal a haya cu e acusado aki cu loke el a haci a traumatiza basta persona, haciendo uzo di arma di candela, cu ta algo hopi serio pa Ministerio Publico. E Prueba y declaracionnan contra VL ta contundente. E persona aki ta bini di afo y ta duna Aruba un mal number cu e hechonan cu el a comete. Mirando e seriedad di e caso, OM ta haya cu un castigo di 12 año ta na su luga.

E homber mes no kier a papia mucho y a laga tur cos den man di su Abogado. Sinembargo no a convence Hues pa tene piedad di e Venezolano aki cu a causa hopi daño na number di Aruba. E Hues a dicidi di cera tratamento di e caso bisando cu e pruebanan ta suficiente pa condena e homber. Finalmente el a impone un castigo di 11 año incondicional.

LTE Prepaid Data BUNDLE

Mas Balor, Mas LTE Data, Mas Social Media Ilimita

500 MB
1 dia
Ilimita*
WhatsApp
Facebook
Instagram
Snapchat
Pinterest
Afl. 5,-

1 GB
7 dia
Ilimita*
WhatsApp
Facebook
Instagram
Snapchat
Pinterest
Afl. 15,-

3 GB
7 dia
Ilimita*
WhatsApp
Facebook
Instagram
Snapchat
Pinterest
Afl. 30,-

4 GB
30 dia
Ilimita*
WhatsApp
Facebook
Instagram
Snapchat
Pinterest
Afl. 49,-

Cumpra Data *123#

*Sigui usa WhatsApp, Facebook, Instagram, Snapchat y Pinterest despues cu bo Data caba y te ora cu bo bundle caduca. Promocion ta valido te cu 3 di maart, 2019.

Accidente basta formal riba rotonde di Mahuma



DIADOMINGO, den careda di 1:30 di merdia, Polis a bay rapidamente na altura di e rotonde na Mahuma, pa un accidente cu dos persona herida.

Segun cu por a deduci, aparentemente un bromer a sali dilanti di un auto riba e rotonde, cu e consecuencia esaki a cay riba caminda, heridando asina dos persona.

Ta trata aki di un dama un cabayero. Na prome bista e dama tabata musta basta herida, di manera cu a pidi presencia di ambulance p'asina bin duna prome auxilio. E cabayero tambe tabata herida, pero no mesun serio cu e dama. E dama a wordo hiba pa hospital pa observacion. No ta conoci si e cabayero tambe a bay hospital, p'asina atende cu su heridanan.



Prome morto tragico di St. Maarten a keda registra

Como resultado di e impacto, e chofer di 9311-ABB a muri a consecuencia di e heridanan cu el a sufri. E pasahero femenino, kende a keda seriamente herida a ser transporta cu maximo urgencia cu ambulance di Sint Maarten Medical Center.

Morto di e chofer a keda constata pa dr. Mercur, kende a presenta na sitio di e accidente. Ningun di e dos personanan a resulta di no tabatin faha di seguridad bisti.

COLE BAY, Sint Maarten — Polis di Trafico actualmente ta investigando un accidente di trafico, cu a cobra e prome morto di trafico na St. Maarten. E accidente aki a tuma lugar diasabra dia 12 ultim, pa mas o menos 01.35 di madrugada, riba e caminda A.J.C. Brouwers Road den sercania di rotonde di Osbourne Kruythof.

Den e accidente aki, segun oficialnan di Polis cu ta investigando e accidente fatal aki, ta bisa cu tin 3 auto involvi, esta di P-3237, 9311-AAB y P-8883.

E chofernan di P-3237 y di P-8883 no a sufri herida di gravedad, pero si t'asina cu e chofer di P-3237 a resulta di ta bao di influencia di alcohol.

Como tal e sospechoso aki, kende a keda identifica como K.N. (18) a keda deteni n'e sitio di accidente pa mas investigacion.

E prome morto di St. Maarten a keda identifica como Juan Paulino Ortiz, kende a muri instantaneamente. Paz na su resto y condolencia na su famia.




DIADOMINGO merdia, riba e caminda di Noord pa Playa, banda di Lucky Store, un KIA Picanto cora a sali for di un zijweg pa bay noord, net ora cu un KIA Rio blanco tabata biniendo riba un velocidad halto. E no a logra para na tempo, consecuentemente a dal den e KIA Picanto. Tanto e chauffeur di Picanto, como e Rio a resulta herida. Daño material ta basta hopi. Dos persona a resulta herida.

Polis a cera trafico p'asina haci investigacion. A pidi presencia di takelwagen pa move e autonan for di caminda.

Na St. Maarten

Di dos morto tragico den ni 24 ora di tempo



PHILIPSBURG – Ayera mainta, henter comunidad di St. Maarten ta den shock p’e morto tragico di un mucha di 2 año y kende lo a cumpli 3 año awe. E hecho lamentable aki a sosode ayera mainta rond di 10.30. Aparentemente un problema entre dos grupo di mucha homber a conduci n’e situacion caminda un di e grupo aki a trata di manda su auto riba e otro grupo di mucha homber. Un hoben, a logra di bula un muraya y asina scapa su bida, kedando cu algun rasca y un lesion na su pia.

Den cayente di e atake, e mucha homber di 2 año, kende tabata hungando cu su truck chiquito na banda di caminda, a ser alcansa p’e otro auto mortalmente.


E mucha aki a fayece al instante cu lesionnan severo na su curpa, y su garganta cu a kibra malamente.

E chofer tabatin un bate di baseball den su man, pero a dicidi di baha na awa, lagando su auto atras. E victima aparentemente ta yiu di un di e hobennan cu e grupo aki tabata busca pa mata, pero avor a mata e yiu di un di e otro grupo. E mama mes tabata na trabao e momento ey.

E prome unidad Policial cu a yega, den cual tabatin un Polis femenino, no por a contene su emocionnan y mester a ser kita for di e sitio.

Varios Polis a acudi n’e sitio di e siniestro, e.o. por a mira presencia di Hefe di Polis, Carl John y autoridadnan di Ministerio Publico. Nos no a haya identidad di e criatura aki, kende a perde su bida den un forma masha tragico. El a bira di dos morto den trafico di St. Maarten. Condolencia na su famia.

Mayornan cu tin yui homber cu ta bay skol di Savaneta **Kier lanta Savaneta Baseball Club, pa cual tin dirigentenan pa guia un ekipo**



SAVANETA ta pidi tur mucha homber di 4 pa 13 aña cu kier siña hunga baseball, bou number di Savaneta y cu tin interes pa inscribi nan mes.

Sponser nan tin caba, pero nan falta coach pa train e muchanan, y muchanan pa hunga baseball, pasobra baseball a cay hopi aki na Aruba pa nos hobennan, pa motibo di faboretismo.

E veld di Savaneta tin su tribuna, su cushina su bañonan, su magazijn y su bating cage.

Tur esnan cu ta desea di bin yuda pa coach e hobennan ta bon-bini.

Y e mayornan di hobennan di Savaneta, empuha bo yui homber pa hunga baseball, laga nan cuminsa di chikito. Pa mañan nan bira embahadornan di Aruba.

Pa mas informacion por yama Hiacintha Thijsen Trimon, tel 584-7280.

OPPA ta invita su miembronan pa un mainta di charla tocante **Herencia, indemnizacion (smartengeld) y gasto di entiero**

Directiva y Comision di Actividad di OPPA conhuntamente cu APFA y Aurora Funeral Home ta presenta un charla tocante Herencia, Indemnizacion (smartengeld) y Gasto di Entiero.

Lugar ta na Biblioteca Nacional Aruba, diarazon 23 di januari 2019 for di 9 or di mainta pa 12 or di merdia. Entrada ta gratis, pero registracion p'e mainta aki ta obligatorio.

Miembronan interesa por pasa registra nan mes na oficina di OPPA, Sabana Blanco 68A, cuminsando for di awe dialuna 14 te cu diamars 23 di januari durante ora di oficina 9.00 am - 12.00 pm.

Cambia, spaar y gana ta sigui durante Carnaval 65 cu Nagico!

E famoso campaña di Cambia, Spaar y Gana cu Nagico ta continua durante temporada di Carnaval. Gana premio instantaneo y participa p'asina gana e premio mayor di gasoline pa 1 aña gratis!

Tur cliente di Nagico y alabez cliente nobo por participa. Bishita www.cambiaspaarygana.com, yena bo number, e-mail, y number di polisa actual pa gana premionan instantaneo.

Number di polisa por econtra riba bo polisa oficial di cobertura. Clientenan di Nagico por gana diferente premio, cual ta varia entre gift voucher.

Na final di campaña, un cliente lo bira e feliz ganador di gasoline pa 1 aña gratis! Ganador di e gran premio lo ser anuncia dia 27 di february 2019. Nagico lo ta sacando e ganador durante e programa di Den Dje hunto cu Ivo, alabez lo tuma contacto directo cu e ganador.

Si ainda bo no ta cliente di Nagico, cambia bo seguro pa Nagico y tin e oportunidad di spaar 15% of mas riba bo polisa. Con?

Manda bo copia di polisa, copia di rijbewijs valido na 592-3378 y den menos di dos dia bo oferta lo ta cla.



Por ultimo Nagico kier a recorda tur persona cu dia 31 di januari lo t'e ultimo dia pa paga nummerplaat, pasa na Nagico y renoba bo seguro.

Bishita Nagico Savaneta of Dakota di dialuna pa diabierna entre 8or di mainta te cu 5or di atardi, por yama na 588-7000 of simplemente subi e pagina di Facebook pa mas informacion.



FOR di fin di 2009 Aruba a conoce un maneho financiero cu a wordo usa pa paga p'e "sprookjes" di Mike Eman cs. (AVP-POR). Asina nos mester a tende cu na 2020 Aruba lo ta 100 Green y cu esaki lo nifica cu Aruba lo bay conoce un crecimiento economico.

E "sprookje" aki manera nos tur sa a hiba nos pueblo na rand di un bancarota sin cu nos a conoce un crecimiento economico significativo.

E "sprookjes" aki a ser financia dor di endueda nos pais descaradamente. Pa colmo cu hopi orguyo y a aumenta e quota di debe di 42% te na 93%.

Tur hende cu sano huicio mester por sa cu un debe asina simpelmente no ta sostenibel. CAft a conseha caba cu MESTER bay baha e debe aki un manera of otro. Ta abase di esaki nos pueblo a worde hiba pa e altar di sacrificio.

Ora cu nos a kere cu nos gobernantenan a haya screment y cu lo stop cu mas enduedamento, nos ta ripara cu esaki absolutamente no t'e caso. Al contrario.

Ta sigui endueda nos pueblo cu e.o. lease-mento, huurmento di edificio di sponsornan, contractonan fabuloso etc etc.

Ora nos a kere cu e epoca di "sprookjes" a desaparece hunto cu Mike Eman, ata su discipulo mayor, Otmar Oduber a aparece cu e locura di "Waste to Energy via mass incineration".

Esaki no ta nada otro cu e desperdicio cu awor ta wordo deposita na un manera irresponsabel den e landfill na Sero Teishi, lo wordo kima den un forno (incenirator) cu ta wordo converti den energia. E supuesto "logro aki ta wordo bendi como e.o. algo super "GREEN" y un rebaho di e prijs di awa y coriente.

E "sprookje" aki no ta nada nobo. Den pasado caba, cu tabata den rood formal, a negosha y a yega na un acuerdo p'e planta di Eco-Gas. E tempo ey caba nos a tende cu esaki t'e "wondermiddel" y cu lo t'e solucion. Y esaki lo baha e prijs di awa y coriente tambe.

Un fracaso total y un otro engaño. Loke si

Debe y mas debe e financiamento di e "sprookje" "Waste to Energy" lo nifica **Debe di Aruba lo yega na 125%**

Pa: Candelario (Booshi) Wever
(parti 1)

a sosode ta cu e pueblo di Aruba mester a paga mas di 20 miyon p'e tuberia y adaptacionnan den WEB, sin cu ni un mililiter di gas a pasa den e tuberianan aki. Straño ta cu ningun hende ta puntra con a para cu esaki? Dicon? Miedo di kico of di ken tin? Nos Parlamentarionan "critico" y "otro" riba esaki ta keto.

Remarcabel ta cu ta mesun asina yama "expertonan" di WEB e tempo ey a negosha y acorda henter e proyecto aki cu EcoGas, awe mester constata cu ta nan mes ta conseha e Gobierno actual (POR-RED-MEP) al respecto.

Dicon awor si nan conseho lo ta bon? Of ta pasobra cu un di nan ta ruman di e Minister, awor si nan lo ta bon? Unda nos Parlamentarionan a keda? Miedo di cuestiona atrobe?

Nos kier ta hopi cla den esaki, mester bin un solucion mas pronto cu ta posibel p'e problema aki, sigur despues cu e Gobierno AVP-POR a boycotea e proyecto di WasteAway di Bouldin & Lawson, cu tabata e solucion cu MEP a laga tras cu a costa 28 miyon florin SIN ENDUEDA nos pueblo!!!

Despues cu 1 di mei 2002 pueblo di Parkietenbos y di Aruba a wordo alivia di e huma di dump ora cu a stop e kimamento di sushi na Parkietenbos. A haci esaki un "sanitary landfill" conforme reglanan internacional. Esaki como un fase transitorio.

Despues di un procedura realmente transparente, bou guia di AIB y FDA y Gobierno (e.o. cu sr. Patricio Nicolas na cabes y cu e Minister a elogia fin di aña), na 2009 Aruba a conoce un solucion p'e problema di desperdicio cu e ponemento den operacion di e asina yama "WasteAway" di Bouldin & Lawson. Atrobe SIN cu mester a endueda nos pais.

Lamentablemente e Gobierno di AVP-POR a boycotea esaki na ordo y asina ey e pueblo di Parkietenbos un biaha mas a conoce e molester e.o. di huma, musca y sangura.

Ta conoci cu tin solucionnan factibel, pagabel y sostenibel available y cu lo no bay hinca Aruba den debenan astronomico cu lo bay hisa e quota di debe na por lo menos 125%!!!!

Segun e documento cu nos ta dispone di

dje y cu nos sa cu sr. Rocco Tjon tambe tin, Minister Otmar Oduber a pidi Bouldin & Lawson pa haci un evaluacion (cu a costa 16 mil dolar) pa instalacion cu tey caba y nan a presenta un solucion factibel, pagabel y sostenibel cu ta haci posibel cu e planta lo por opera atrobe mescos cu el a opera prome cu e boycott feroz di Gobierno AVP-POR.

Y e bon di esaki ta cu pa pone e planta draai atrobe esaki lo costa menos di 5 miyon florin, cual por ser considera "chickenfeed" si compare cu e "SPROOKJE" di WTE cu lo bay costa total por lo menos 720 miyon florin. Sin embargo kico e Minister aki ta haci? E ta laga su "conseheronan" y su "expertonan" di WEB hunto cu TNO traha un raport na unda e.o. ta ser bisa cu e planta di B&L no ta sirbi y cu nunca a funciona.

Di e forma aki ignora e mas di 7 sentencianan di Corte cu ta bisa tur lo contrario y cu ta un BOYCOT feroz di Gobierno AVP-POR t'e causa cu e planta no a funciona ni ta den funcion awor.

Y e hecho cu a scoge pa sconde tras un raport mediocre y yena cu mentiranan pa sigui cu e boycott cu a inicia tempo cu Otmar Oduber orguyosamente tabata forma parti di e Gobierno maligno di AVP-POR.

Lamentablemente e mesun discipulo mayor di Mike Eman ta haya sosten di e fraccion di MEP, cu awor ta "doe mee" cu e boycott y laga un proyecto di MEP cay djis pa miedo pa Gobierno bay cas.

Cu e drechamento di e "WasteAway-plant" e pueblo di Parkietenbos lo a wordo alivia y esaki ta un hecho y no un "sprookje" y esaki sin ENDUEDA nos pueblo mas ainda!!!

Cu nos mester percura pa nos laga nos planeta p'e proximo generacionnan por biba sanamento nos tur ta di acuerdo cu esey. Pero cu nos mester bay haci esaki djis pa complace cu e mafianan di medio ambiente cu kier pretende cu "WTE via Mass Incineration" t'e solucion, ta inaceptabel. Nos lo bay muestra den un proximo articulo cu ehempelnan recien cu esaki ta simpelmente un mentira flagrante. Manera ta ser bisa, dor di e expertonan cu no tin instalacion pa bende, pero si ta expertonan cu por scrutina y desbarata tur e "sprookjes-verhalen" aki: BURNING WASTE IS.....WASTEFUL!!

Prins & Panchonan di Carnaval 65 ta conoci



HARBOR ARENA: Diasabra anochi a tuma lugar e elecion di prins cu pancho di Aruba su carnaval. Un harbor Arena yen yen di hende. Amantenan di Aruba su carnaval a bay massalmente na e evento Carnavalesco aki.

Durante e elecion tur cos tabata muestra hopi trankil y hopi pret, e participan-tenan a sa di a pone un tremendo show y esaki sigur a haci hopi dificil pa e huradonan por a tuma un decision, pero na final di e evento nan a logra escohe e Monarcanan mihor pa Aruba su Carnaval 65.

Esaki ta e resultadonan:

Como Prins y pancho infantil, Joshmar De cuba (Prins antes) y Jaymar De Cuba (Pancho awo) ambos tin 9 aña di edad y ta representa TOB Carnival Group.

Como Prins cu Pancho Hubenil, a keda elegi Dwayne Dabian (Prins Mal) y Obi Tromp (Pancho Tempo), ambos tin 13 aña di edad y nan ta representando Colegio San Antonio/ TOB

Como Prins y Pancho Grandi, a keda elegi Charles Rafini (Prins Bon) y Micheal Quant (Pancho Malo) nan ta representando Pink 4 Life.

Accidente di trafico cu hopi daño material na entrada di Divi Phoenix



DIABIERNA algo prome cu 12'or mey anochi un accidente ta sosode den e entrada di Divi Phoenix.

Mirando e impacto duro a pensa cu lo por tin hende herida, pero na yegada di patruxa policial a constata cu esey no t'e caso. Mesora agentenan di Strand Politie a constata bastante daño material. N'e sitio chauffeur di e Glanza a bisa nos cu e tabata bayendo direccion noord, y dado momento a bay pasa un Nissan Versa V-car. Pero pa mala suerte e Versa a cuminsa hala na su man robes, pa bay drenta Divi Phoenix causando cu chauffeur di e Glanza a bay maniobra rancando e bumper di e Versa. Y despues a pasa over algun baranca y bay caba di dal contra un pal'i luz.

Por a mira cu e airbag di e Glanza a bula, indicando un impacto basta duro contra e pal'i luz.

Esnan manehando e Versa V-car ta turista procedente di Venezuela. Takelwagen a wordo pidi pa hala e autonan for di caminda.



Grant Thornton a conoce crecimiento positivo riba e mercado internacional



GRANT Thornton ta mira atras riba un 2018 exitoso unda cu nan a wak un rendimiento record di casi 5.5 biyon dolar y un crecimiento di casi 10% cual tabata e mas grandi den e ultimo 6 añanan. E resultadonan aki ta muestra un progreso significativo pa Grant Thornton cu ta pone su enfoca riba servicionan profesional y duradero.

Transformacion y fusionnan den paisnan manera Hapon y Sur Africa, combina cu crecimentonan fuerte den regionnan di Asia Pacifico y Africa tabata factornan determinante.

Grant Thornton a duna bon bini na clientenan grandi y e red a crece yegando na un total di 55.686 empleado den 131 diferente pais cual ta un crecimiento di 6.3%. Riba e mercado Africano mester bisa cu Grant Thornton a mira un crecimiento di riba 20% y den Asia Pacifico y Europa a mira un crecimiento di 10% of mas.

Apesar di inseguridad politico y tension riba e mercado comercial internacional, e circunstancianan ta keda solido p'e clientenan y red di Grant Thornton.

Grant Thornton a muestra un crecimiento fuerte riba e promedio Europeo y esaki ta conta pa Tax y Advisory tambe.

Grant Thornton ta conta cu alrededor di 55 mil empleado mundialmente cu ta forma un plataforma solido

y e compania ta haci uzo di esaki pa sigui enfoca riba e direccion cu e compania a pone su dilanti strategicamente pa sigui transforma y mehora su servicionan.

Grant Thornton ta percura pa tin e persona corecto y capacita n'e lugar corecto p'asina keda cumpli cu e deseonan di e cliente.

Apesar cu e mercado mundial lo keda cu inseguridad, inestabilidad y risiconan den 2019, e CEO di Grant Thornton ta conciente cu e acuerdonan basico economico ta keda solido.

Clientenan sa cu ainda tin oportunidadnan eyfo y mas cu nunca nan ta asercando Grant Thornton yudanan logra nan metanan.

Edsel Lopez como Hans Ruiter, kendenan t'e partnernan cu ta dirigi Grant Thornton na Aruba, ta positivo y satisfecho cu e desaroyonan di Grant Thornton tanto local como internacional ya cu na Aruba tambe Grant Thornton a conoce un crecimiento substancial.



Bon Bini na Cuba; Un experiencia culinario exclusivo!

Renaissance Aruba ta presenta 'Havana Nights'

RENAISSANCE Aruba Resort & Casino ta continua cu su biahe culinario rond mundo. E aña aki e 'fanatico culinario' lo por disfruta di un serie di 'Pop-up Restaurant' cu Renaissance so por presenta, cada uno cu un toke culinario diferente y autentico.

'Havana Nights' lo priminti di bira un 'Pop-up' extraordinario cu lo hibabo riba un paseo den e cayanan historico di Havana, Cuba.

Den 2019 por spera un otro serie culinario y e concepto di 'Pop-up Restaurant' lo conoce un cambio, esaki segun Director di Food & Beverage pa Renaissance Aruba, Diego Lemasson.

"Nos kier cuminsa na brinda un 'experiencia' p'asina por descubri sabornan diferente. E aña aki por spera un cantidad di pais nobo durante di 'Renaissance Pop-Up' caminda lo presenta un fusion di cuminda, cultura y musica den un solo experiencia culinario exclusivo".

HAVANA NIGHTS!

Bon Bini na Cuba! 'Havana Nights' lo t'e prome 'Pop-up Restaurant' di 2019 y e lo tuma lugar diana 18 y 19 di januari na Renaissance Marina Hotel su Upper Pool Deck. Un anochi Cubano exclusivo.

Un di e cambionan especificamente p'e pop-up aki ta, cu lo presenta unicamente dinner, cu capacidad limita. Disfruta di tur locual Cuba tin pa ofrece na un prijs cu ta inclui un *family style dinner* Cubano, un *Open Mojito Bar* cu diferente sabornan di Mojito presenta pa Ron Caney, un *rum tasting* cu diferente sabor di rum y musica 'live' di Trio Yalorde directamente for di Corsou cu lo trece e sabor autentico di Cuba den 'Havana Nights'.

Especialmente pa 'Havana Nights', Cigar Emporium Aruba, e cas di ciga na Aruba, lo duna tur cu ta presente un 'Romeo & Julieta' como welcome. Tuma nota cu, Cigar Emporium Aruba lo presenta un otro seleccion pa cada anochi di 'Havana Nights'. Lo tin asiento limita, pues e lo ta un experiencia culinario exclusivo. Mirando cu e ta un concepto nobo den e serie di pop-up, lo traha unicamente cu reservacion pre-paga. Pa mas informacion of reservacion por tuma contacto cu e Renaissance Navigator na 523.6115.



E famia di Hilton Aruba Caribbean Resort & Casino a pasa un dia ameno riba De Palm Island



E departamento di Recurso Humano haci un tremendo trabao organisando e family day perfecto pa e miembronan di ekipo, cu ta traha duro, hunto cu nan famia. E invitacion pa De Palm Island cu un programa yena cu actividad tabatin un bon reaccion, cu mas di 400 persona cu a probecha di e oportunidad.

E dia a cuminsa cu un desayuno completo, sigui pa un lunch buffet, open bar durante full e dia y entretenimento di un DJ.

E miembronan di ekipo a disfruta di un variedad di actividadnan cu tabata disponibel riba e isla, cu a inclui snorkeling, banana boat, e slip grandi na e parke acuatico Blue Parrot, kids corner, y un variedad di weganan competitivo riba beach manera volleyball, futbol, basketball y tennis.

E programa di entretenimento di e atardi a inclui les di salsa, foosball humano, ping pong y e ultimo adicion aventurero riba e menu di e isla di euforia, zip lining 446 pia psando riba de Palm Island y 33 pia den aire, air jumping, y un di e cuatro air-jumpers ta bai te 22 pia den aire.

Algun miembro di ekipo a opta pa tuma un rumbo mas relaha durante e dia descansando den sombra, combersando cu nan coleganan y nan famianan den un ambiente informal, sin ningun pura, experienciando un tiki di vakantie.

“Tabata un placer pa nos ofrece nos miembronan di ekipo e oportunidad di pasa tempo di calidad cu nan yiunan y pareha. Trabao ta tuma hopi di nan tempo y nos ta contento di por a malcria nan den un ambiente dibertido y all-inclusive”, asina Glenn Farro, Director di Recurso Humano a bisa.

Záhyon Klabér a sali Campeon di Hulanda den Taekwondo



DIASABRA ultimo a tuma lugar na Den Haag, Hulanda e Nederlandse Kampioenschappen. Jourdé y Záhyon Klabér a participa representando e scol di Taekwondo di Henk Meijer. Jourdé Klabér a perde su prome pelea y por a bay bisti paña pa despues wak su ruman chikito bringa.

Jourdé Klabér tabata hopi desapunta, pasobra el a perde su pelea pa 1 punto. Mundo no a caba ainda pa Jourdé Klabér, pasobra e mester bay traha mas duro p'e Santo Domingo Open na luna di maart.

Záhyon Klabér tabata den un poule di 7 atleta y Záhyon Klabér su prome pelea tabata contra di Caner Sucuoglu y Záhyon Klabér a gana esaki cu un score di 22-6. Záhyon Klabér su siguiente pelea a bay contra di Zakaria Benziane y Záhyon Klabér a gana esaki cu un score di 24-4.

Den final Záhyon Klabér a topa cu Ted Brilhuis di e scol di Taekwondo Oude Luttikhuis y e pelea aki a hala hopi atencion di e publico cu a rondona veld 1 completamente pa mira e final aki y Záhyon Klabér a gana esaki cu un score di 19-17.

Henk Meijer tin hopi aña caba ta guia e team di Brazil Taekwondo y ta hopi contento cu e logro aki. Henk Meijer su scol a logra dos prome lugar den e Nederlandse Kampioenschappen.

Záhyon Klabér t'e di tres persona di Aruba cu a logra gana Nederlandsche Kampioenschappen.

Rudy Wong-Fat t'e prome cu a sali campeón di Hulanda varios biaha den e añanan '70 pa '80. Rudy Wong-Fat a logra sali campeón di Europa den aña '80 tambe.

Alberto Klabér, tata di Jourde y Záhyon Klabér a sali varios biaha campeón di Hulanda den añanan '86-'92 representando Hulanda.


Alberto Klabér a logra medaya di brons den e campeonato Europeo den aña '90.

Brazil Taekwondo Stichting ta contento cu e logro di Záhyon Klabér kende a demostra su habilidad.

Awor lo sigui cu training den preparacion pa clasificacion p'e Pan Americano na Santo Domingo y Henk Meijer ta bay ta na Aruba na luna di februari pa cuminsa cu e preparacion.

Time Out

Monica Pimentel ta spera cosnan grandi pa 2019 pa su mes y Impact Taekwondo



Beatrix Tromp a gana e premio mayor di SETAR su campaña di fin di año

SRA. Beatrix Tromp a gana 5000 florin cash cu tabata e premio di mas grandi dialuna ultimo durante e programa DEN DJE cu a transmiti for di SETAR Teleshop Irausquinplein “live” via Telearuba.

Dialuna nochi den un Teleshop Irausquin yen yen di cliente y nan famianan cu a acudi pa reclama nan premio cu nan a gana, a pasa un rato hopi emocionante na momento cu nan cada un a haya un turno pa kies un bala for di den un “kerstboom” cual tabata contene varios premio hopi atractivo.

Premionan a varia di e.o. kadobonnan di 300 florin, smartphones y premionan cash cu a varia di 500 pa 3000 florin. Tabatin un solo premio di 5000 florin cash.

Un total di 50 cliente a gana e premionan di SETAR: Edwin Chirino, Jeanet de Windt, Zelda Franca-Solognier, Mariano Pablo, Donna Fortin, Myrna Everon, Mario Noguerra, Stella de Windt, Elisabeth Maduro, Leonita Odor, Jacinto Curiel, Irene Hazbun, Eric Rafael, Remigio Figaroa, Edrick Gomes, Valentina Muguerza, Andre Maduro, Marleen bakker, Dionnisia de Cuba, Mercedes Franken, Leidy Orozeo, Damiano Kelly, Louisa Maduro, Omaira Britten, Marta Kock, Maria Dirks, Alina Castillejo, Yasna Strampic, Jarienne Boekhoundt, Merrill Robles, Richard Trimon, Tanja Maduro, Robertico Semeleer, Alberto Mateo, Alexio Croes, Anette Wilson, Antonio Feliciano, Anabella M V/D Lisle, Jhooell Arqvinigo, Hubert Geerman, Roland V/D Linde, Juraima Henriquez, Shewying Chai, Felen Velasquez, Lidwina Figaroa, Otto Alleyne, Lilian Figaroa, Lourdes Maduro y Rocio Narvaez Martinez.

SETAR ta felicita tur su cliente ganador y ta bisa danki na henter e pueblo di Aruba cu a participa activamente den e campaña di fin di año.

Riba e potret por mira momento cu a anuncia e ganadora di e premio mas grandi di SETAR.



Programa “Hoben Activo, Hoben Feliz” ta continua den año 2019

NA luna di october a inicia e programa “Hoben Activo, Hoben Feliz”, unda cada dos siman ta introduci un deporte nobo.

Den e prome dos lunanan e muchanan a cera conoci cu e deportenan di basketball, table-tennis, karate y atletiek.

Meta di e programa aki ta pa stimula e hubentud pa ta mas activo y saludabel. E programa aki ta tuma lugar na Sport Centrum San Nicolas dialuna y diarazon for di 3:00 pa 5:00 di atardi.

Actividadnan durante e programa ta wordo dirigi na muchanan di 9 pa 13 año. Intencion ta p’e lesnan wordo duna dor di e clubnan di San Nicolas p’asina ta mas facil p’e muchanan por join despues di e programa.

Durante e luna di januari lo ofrece lesnan di Taekwondo dia 21, 23, 28 y 30 di januari. Luna di februari lo ofrece lesnan di volleybal, e prome dos simannan, dia 4, 6, 11 y 13 di februari y e ultimo dos simannan di februari lo ofrece lesnan di Self Defense, dia 18, 20, 25 y 27 di februari. Luna di maart, april y juni, e lesnan lo continua cu algun otro deporte cu lo wordo anuncia despues.

Pa participa n’e programa HAHF por pasa registra na Sport Centrum San Nicolas entre 7:30am-4:30pm. Inscripcion ta completamente gratis y tur mucha cu ta participa n’e programa mester trece paña y keds adecua pa deporte.

Pa mas informacion di e programa por yama IBiSA libremente na 584-8903/582-4987 of manda un email pa schoolsportibisa@gmail.com.

Tambe por bishita e Facebook page di IBiSA Aruba pa mas informacion di e programa aki.



Prome torneo di ahedres pa 2019 a start



DIAHUEBS anochi, a start den su clubhouse na Nieuwstraat 11, e prome torneo di ahedres di diahuebs anochi. Esaki ta nos campeonato di club. Un cantidad di 16 hungador a inscribi p'e prome anochi.

Resultadonan tabata como lo siguiente: Jose Pesqueira a gana di e hoben Ayden Dirks, Angelo Franken a perde di Octavio Croes, Peter v/d Brink a gana di Daniel Diaz, Kyell-Jean y Eldrick Donata a tabla.

Vetarano Alvin Howell tambe a tabla cu hobencita Thamara Sagastegui. Rolin Croes a perde di Ilya Stetsenko. Randy Tromp a gana di hobencita Aimara Ballester y Samantha Aponte a perde di Enrique Jacopucci.

Pa diahuebs awor dia 17 di januari, e di dos rond lo wordo hunga. Lo topa otro: Ilya Stetsenko – Jose Pesqueira; Octavio Croes – Randy Tromp; Enrique Jacopucci – Peter v/d Brink; Eldrick Donata – Alvin Howell; Thamara Sagastegui – Kyell-Jean Antonio; Ayden Dirks – Rolin Croes;

Aimara Ballester – Angelo Franken y Daniel Diaz – Samantha Aponte.



E weganan ta cuminsa pa 7:30 di anochi. Waiting time ta 30 minuut.

Hungadornan cu a haña nan mes stroba diahuebs anochi, por participa ainda n'e torneo aki. Mester presenta diahuebs awor no mas laat cu 7:30pm na club pa registra. E prome rond lo wordo considera como perdi pa default. Éxito na tur participante.

Vocero nobo di Guardacosta di Caribe

WILLEMSTAD – For di 1 di yanüari Shalick Clement t’é vocero nobo di Guardacosta di Caribe Hulandes. Na momento cu medionan di comunicacion tin pregunta tocante e organisacion nan por tuma contacto cuné. E ta re-emplasá Cynthia Devere kende a actua como vocero suplente despues cu Roderick Gouverneur a bay na jüli 2018.

Shalick Clement tin años di experiencia riba tereno di mercadeo y comunicacion. Despues cu el a kaba su estudio di HEAO na Hulanda, el a bolbe Còrsou caminda el a traha e.o. como Relacionista Público.

“Como vocero di Guardacosta di Caribe lo mi duna informacion relatá na Guardacosta su operacion y actividadnan.

Tambe lo mi kier consentisá y informá e comunidadnan di e islanan den Caribe Hulandes tocante di seguridad y actividadnan ilegal riba laman”; esaki segun Shalick Clement.



Guardacostata gradicí Roderick Gouverneur p’e añanan cu el a laborá p’e organisacion y ta dese’é éxito den su carrera nobo. Guardacosta ta deseá Shalick Clement éxito y yamé’bon bini na Guardacosta di Caribe Hulandes.

Dutley Schoobaar su kaso lo keda tratá 13 di febrüari binidero

WILLEMSTAD. E suidadano Dutley Schoobaar di 37 aña di edat tabata den sala di korte ayera pa tratamentu di su kaso proforma. Mesora a konkluí ku tratamentu di su kaso riba contenido lo ta 13 di febrüari binidero.

Dutley Schoobaar ta akusá di a maltratá un adikto na droga dia 2 di sèptèmber 2018 riba Brionplein ku un pipa di heru. E hòmer aki, esta Dutley Schoobaar ta akusá di intento di asesinato i of intento di maltrato pisá.

Den pasado Dutley Schoobaar tabata interná den klínika Capriles.

Ayera wes a splika di tin nesesidat pa studia rapòrtan di sikiater, sikólogo i tambe Reclassering skibí riba Schoobaar promé ku dikta un sentensia al respekto.

Tambe su abogado señor mr. Uldrick Dickens a pidi pa

studia denunsianan ku su kliente Dutley Schoobaar a yega di hasi den pasado serka polis, ya ku e ta pretendé ku e víktima tabata hòrtá su kosnan i ku posiblemente pa e motibu ei su kana lo a yena i el a disidí di agredí e víktima kasi moralmente ku e pida tubu di heru.

Mas aleu durante tratamentu di e kaso, Dutley Schoobaar a pidi wes pa atendé su sirkunstansia médiko, aparentemente e akusado aki tin un malesa pa kua e no ta hañando e tratonan rekerí. Enfin wes a konkluí ku tratamentu di e kaso lo kontinuá dia 13 di febrüari binidero.

# 1 <i>OnLine</i>	AWE Mainta
Tel: 583-1400	
Fax: 583-14444	
Facebook: www.facebook.com/awemainta	
Website: www.awemainta.com	
E-mail: noticia@awemainta.com	

Despues di a bati bewaker malamente

Gèng di atrakadó a hòrta galiña konhelá di Centrum bende ku restorant chines

WILLEMSTAD. Repasando e kasonan penal ku tabatin den korte diabierna, wes Edelenbos i fiskal di Ministerio Publiko a konstatá ku por lo general e miembronan dje gèng di atrakadó ku a bin dilanti ayera ta trata di akusadonan ku ya tin un pasado ku hustisia.

Ta delinkuentenan ku no a kaba skol i ku a bira 'drop out' i ta kana riba e ruta fiho di kometé krímen.

Ekspertonan manera sikólogo, sikiater i Reclassering a pronostiká un chèns grandi ku nan lo kai den ripitishon. Pa loke ta trata e kaso di atrako na Industriepark ku ta situá na Seru Loraweg, dia 7 di febrüari 2018 tabatin ladronisia di 175 paki di galiña (frozen chicken / drumette) ku nan a hòrta bai kuné, despues di a bati e bewaker Riche mal batí, kita su pòtmòni fo'i dje ku tabata kontené 500 florin, pòrtoton i telefon mobil.

A mara e bewaker na man ku pia pa djei habri un kòntainer di e empresa Centrum den e depósito.

Investigashonnan dirigí riba e grupo aki a kuminsá ku denunsia e bewaker Riche i denunsiente señora Lindeboom, kasá di Ribeiro.

Riba e telefon hòrtá polisnan a sigui delaster kombersashon.

Nòmbernan di 'pila' pasobra di kariño no por yama esaki, ku tabata skeiru bai bin durante e kòmbersashonnan aki ta "Blood", "Dundo", "Buchito" i "Tuti".

Ademas un ke otro por a mira klaramente riba e filmashon di video na e sitio kaminda e atrako a tuma lugá. Mas aleu a bini padilanti ku a bende e galiñanan hòrtá ku un komersiante chines riba Santa Rosaweg.



ROBO DI TRUK

Mas aleu a bini padilanti e kaso di un vehíkulo di karga blanku (trùk) ku nan a hòrta na altura di Sony Trading ku ta pèrtenesé na un suidadano di fam Isenia.

Pa loke ta e atrako na Kaya Caramèlè dia 20 di febrüari 2018, e atrakadónan aki a demostrá ku nan ta aktua sin ningun klase di kompashon, pasobra ta maltratá e víktimanen sin mizèrikòrdia, bati nan ku kabu di revòlver, menasá ku lo tira nan mata si nan resistí.

Hasta skòp ta skòp e víktimanen, eksigí pa nan stòp di move nan kurpa, enfin proporshonando tratonan inhumano i kruel ku tin su konsekuensianan di trouma pa largu tempu serka e víktimanen aki.

Asina teribel Kòrsou a bira

Atrakadó Mama di 7 yu a sali korte bai prison dirèkt!



WILLEMSTAD. Por kalifiká e suhetonan di mas baho kalaña e kuarteto konsistiendo di Shurella Seintje (40 aña di edat), Riangelo Martina (26 aña di edat), Kahim Aitatus (24 aña di edat) i Shurmaine Seintje (23 aña di edat) kendenan tabata den sala di korte, djabièr-
nè 11 di yanüari pa un dje krimennan mas teribel ku ta akosá Kòrsou ultimamente: atrako.

E grupo di bandidu aki kendenan no tin konsenshi dje daño mental ku nan ta kousa hende inosente, tabata den korte pa varios krimen ku nan a kometé.

Nan a tira atrako na Kaya Caramèlè, atrako na Bragadushiweg, atrako na Industriepark Seru Loraweg i la-dronisia di un trùk blanku.

Pero pa duna un bista mas eksakto di seriedat di e kasonan aki ta nesesario para ketu pa kuminsá na e situashon di un di e akusadonan, esta Shurella Seintje ku tin 40 aña, pero ku ya ta mama di 7 yu di kua 3 di e yunan ta será den prizon aya na Koraal Specht.

Shurella Seintje mes a bai será na diferente okashon, ta remarkabel ku e ta okupá su mes ku benta di kosnan ku su yunan ta hòrta.

Resientemente Shurella Seintje tabata será, pero a interumpí su periodo di enkarselashon debí ku e mester a duna luna lus na su di 7 yu.

Diabierna na momento di tratamentu di su kaso Shurella Seintje a kana drenta sala di korte ku e beibi ku a kaba di nase den su brasa.

Wes mr. Edelenbos i fiskal señora mr. Hato Willems, mesora a mustra Shurella Seintje ku no ta aseptá beibi sintá riba skochi di un sospechoso den sala di korte. E kaso aki lo dura sigur 1 ½ ora pa 2 ora, segun e wes i apsolutamente lo no por pèrmití e beibi asina tantu ratu den sala di korte riba skochi di su mama, siendo dilanti di mesa bèrdè.

Ratu despues Shurella Seintje mester a deshasí di e beibi, posiblemente e beibi lo a keda pasá over pa otro famia presente.

Fiskal ademas a mustra Shurella Seintje ku ainda e tin kastigu pa kaba di sinta i asina sosodé tambe ku dirèkt na final di tratamentu di e kaso enbèrdat polisnan presente a aserká Shurella Seintje gui'é hiba prizon mesora pa e 6 lunanan ku e mester kaba di sinta di un kaso bieu.

Komisariado di RdK ta un meskla politiko i profeshonal



WILLEMSTAD. Refineria di Kòrsou N.V. ku te instansha ku ta supervisá kon PDVSA ta manehá i anda ku nos refineria, ta un kuerpo importante mientras ku nos tin refineria ounke su futuro ta insierto.

Pa e kompania di gobiernu por kumpli ku su tarea di vigilá e refineria i e operador, riba e gerensha tin un hunta di komisario ku gobiernu ta nombra.

Generalmente bisá nombramentu di komisario den kuerponan di gobiernu tin un karakter politiko kaminda ta wak no solamente e kapasidat intelektual i tekniko dje kandidato pero alabes di ki koló politiko e ta.

Konstelashon dje hunta di komisario di Refineria di Kòrsou N.V. no ta diferente for di otro instanshanan komersial of sosial di gobiernu.

Pa tur komisario tin un fecha di drenta e hunta i e fecha pa nan baha.

Den mayoria di instanshanan di gobiernu e lista aki ku yama rooster, ta un Rataplan.

Tin varios kompania of fundashon ku tin apenas un komisario mientras ku den otro fundashon i kompania

komisarionan su tempu a vense masha ten pero gobièrnu no a nombra hende nobo.

I nan ta sigi kobra....

Na turno pa kambia hunta di komisario e dlanan aki tabata Refineria di Kòrsou N.V. i e lista di miembronan dje ta lesa manera un lista kombiná di profeshonal tékniko i profeshonal 'politiko.

Den e kaso aki komisarionan polítiko di PAR i PIN.

Aña pasá kuater komisario mester a baha for di direktiva di Refineria di Kòrsou i e otro nan tin ku baha na 2022. E komisarionan aktual ta Gilbert Martina kende despues di a baha bai for di ENNIA ti un momento pa otro a haña nombramentu komo direktor na Hospital nobo.

Leopold Rigaud ta palanka di PAR i e tambe ta den e hunta igual ku Alwin Keli kende ta un profeshonal tékniko di pura sepa igual ku Gregorio Donata i Norbert Chaclin i Kenneth Mercelina.

Chaclin tabata direktor general dje refineria un temporada.

E lista a kuminsa haña su koló politiko ku nombramentu di Carl Camelia den e kuerpo komo esposo di Minister Suzanne Camelia.

Tratamentu di kaso di Edgard Leesly Santos despues di basta tardansa



WILLEMSTAD. Tratamentu di kasonan den korte a sufri hopi tardansa ayera debí ku wes mr. Edelenbos a profundisá inmensamente den un di e kasonan promé. Abogado mr. H.C. van Blarcum, kende en prinsipio tabata na tempu a disidí di bai atendé un otro asunto, pero esaki tabatin su konsekuensia.

Tratamentu di e kaso di Edgard Leesly Santos di 22 aña di edat mester a warda hopi largu promé ku e abogado regresá bèk den sala di korte. Enfin, Edgard Leesly Santos ta akusá di a kòrta un suidadano di fam Muller malamente den kara bou di su wowo ku un bòter kibrá.

E suseso aki tabata dia 18 di aprel 2018 i ya Edgard Leesly Santos tin vários luna será kaba i ainda e kaso no ta kla pa trata riba kontenido. Ta wardando riba rapòrt di ekspertonan i wes a pidi eksplísitamente pa sòru pa e

rapòrt médiko ta mihó redaktá.

Su abogado mr. van Blarcum a para ariba ku e petishon pa laga su kliente temporalmente den libertat, pendiente di tratamentu di e kaso próksimamente. Fiskal sinembargo a haña ku e kaso aki ta muchu serio, e forma di maltrato ta demasiado kruel.

Abogado van Blarcum a mostra ku su kliente a keda menasá promé pa Muller, ku ta un suidadano ku un kurpa asina grandi i grueso, komo tal Edgard Leesly Santos no kier a kore ningun riesgo i a pasa man kue un bòter kibr'é i kòrta e víktima den kara.

Wes tambe a haña ku no por laga Edgard Leesly Santos temporalmente den libertat, e mester warda te 13 di febrüari binidero ora ku reanudá tratamentu di su kaso riba kontenido.

Registra awo!

Manda bo e-mail na noticia@awemainta.com

Ricibi AWEMainta tur dia den bo inbox



www.awemainta.com



www.facebook.com/awemainta



583-1400



583-1444

Manera debe ser

Fiskal a pidi hopi aña presu pa grupo di atrakadó violento



WILLEMSTAD. Un di e víktimanan dje gèng di e muhé Shurella Seintje (40), Riangelo Martina (26), Kahim Aitatus (24) i Shurmaine Seintje (23) kende presente den sala di korte ayera a konta brevemente kiko e ta pasando aden ainda, despues di e eksperiensha terriblemente amargo ku e tabatin ku e atrakadónan kruek aki. E bandidunan a hòrta 3 televishon den e kas i polisnan ku a vigilá e bandidunan aki a haña Shurella Seintje ku su hòmber nobo di fam Bonifacio den un outo ta kore dal buelta buska bendementu pa e televishonnan hòrtá. Remarkabel ta ku pa un di e televishonnan ya nan a logra haña un doño.

Pa e kaso na Bragadushiweg a konsiderá Shurella Seintje ménos envolví, komo tal ela keda apsolvé.

Martina i Seintje a papia i Aitatus tambe.

Seintje a konta polisnan te den detaye kon nan a hòrta e trùk blanku ku despues nan a karga ku karni hòrta fo'i dje kòntainer.

Den sala di korte ayera vários di e akusadonan a ninga i direpente a bin ta hasi otro deklarashon, pero fiskal señora mr. Hato Willems a ignorá nan mentiranan a mostra ku e pruebanan ta legalmente i konvinsentementamente

probá.

Sumanan di daño i perwisio ku e víktimanan a pidí i ku Korte a honrá ta entre otro 9039 florin di parti di Centrum Supermarket i Nafl. 8426,97 den e kaso di Kaya Caramèlè.

Abogadonan envolví pa e defensa tabata mr. Uldrick Dickens pa e akusado Riangelo Martina, pa Shurella Seintje señora mr. M. Obispo-Noor, pa Kahim Aitatus mr. Maribel Gomes, pa e akusado Shurmaine Seintje abogado mr. Alejandra.

Enfin pa e akusadonan prinsipal den e atrakon aki, ménos e mama Shurella Seintje, fiskal a pidi e siguiente kastigunan:

- * pa Riangelo Martina 6 aña di prizon, kitando e periodo ku el a pasa den aresto preventivo

- * Pa Kahim Aitatus 9 aña, kitando e periodo ku el a pasa den aresto preventivo.

- * Pa e yu hòmber, Shurmaine Seintje un kastigu di prizon di 8 aña, kitando e periodo ku el a pasa den aresto preventivo.

Wes señora mr. G. Edelenbos a keda ku 1 di febrüari e lo dikta sentensia despues di pasa den e bulto grandi di papelnan ku ta forma e fail di e akusadonan aki.

Tres hòmbler a disparse na Kòrsou, dos foi aña pasá

WILLEMSTAD. Outoridatnan polisial a emiti partisipashon den kaso di tres homber ku a disparsé for di Kòrsou i kendenan dos a disparsé for di aña pasá pero pa si akaso a ripiti nan deskripsjon.

Un dje personanan aki ta e hóben Rendrick Valentino Martis kende tin 24 aña di edat i kende djabièrnè 7 di desèmber 2018a sali su kas na Kaya Bologna for di 9'or di mainta i no a retorná mas.



Na momentu ku el a sali kas e tabatin un jeans blou i un shirt bèrdè manga largu bistí. Na su pia e tabatin un slòf pretu di marka Reef i su brasa drechi ta kubrí kompletu ku tatuaje.

Fisionomia di Rendrick Martis ta:

* altura: 1.70 meter i postura delegá

* Kabei pretu i koló di kueru ta maron kla i koló di wowo ta maron.



E otro persona ku polis ta buskando su paradero ta Clifford Prince di 39 aña di edat kende a sali su kas for di oktober aña pasá i no a retorna. Nan a busk'é na dos direkshon kaminda e sa keda pero sin resultado


Su fisionomia ta :

* Largura: 1.80 meter i postura: normal;

* Kabei: pretu, koló di kueru kla i wowo maron i kara oval.

Clifford tabatin un kèts di e marka 'Jordan' bistí. Tambe e tin tatuaje na su man robes parti abou, na lomba i pia. Polis ta supliká tur hende ku por duna kualke informashon tokante di Clifford, pa tuma kontakto ku polis na e number di telefòn 917 òf na e number anónimo 108.

Búskeda di persona pèrdí.



Polis ta pidi búskeda di e hòmbler Charles Francisco Josefina kende a nase na Kòrsou di 57 aña di edat. Djabièrnè dia 4 di yanüari ultimo entre 10'or pa 10.30'or di mainta Charles a sali kas na Bonam ku destinashon Playa Canoa pa bai piska. Na momentu ku ela sali kas e tabatin un jeans blou i un shirt koló kla bistí. I e tabatin un tas di lomba di koló pretu/

blou.

Fisionomia di Charles ta lo siguiente:

Haltura: 1.79 m i Postura: delegá;

Kabei: kortiku pretu/blanku;

Koló di kueru : maron skür;

Koló di wowo : maron skür;

Polis ta supliká tur hende ku por duna kualke informashon tokante di Charles pa tuma kontakto ku polis na e number di telefòn 917 òf na e number anónimo 108.



**Sintonisa tur merdia e duo di periodista
Alexa Werleman y Victor (Toko) Winklaar
Den Noticia na G-FM 99.9**

**Di dialuna pa diabierna
cu noticia sin miedo**



Delegashon di Kòrsou a mustra na St.Maarten:

No ta sigi palabrashonnan relashona ku Areglo di Disputa

WILLEMSTAD – E delegashon di Kòrsou ta lamentá ku apesar ku e kuater paisnan konhuntamente a palabrá e puntonan di salida durante dje IPKO di 2015, a entrega un konsepto lei di reino Areglo di Disputa, ku no ta kumpli ku e puntonan di bista aki.

Relashona ku e proposishon enkuanto e Lei di Reino enkuanto Areglo di Desputa, e delegashonnan ta akorda lo sigiente durante dje IPKO na St.Maarten, e siman aki. E delegashon hulandes ta indika ku a drenta un fase nobo, ku entrega dor di gobièrnu di Reino di e asina yamá: Rijkswetvoortel Geschillenregeling (Mensahe di 29 di November 2018), na Tweede kamer i tambe e entrega na Staten di Aruba, Kòrsou i St.Maarten.

E prosedura di lei di reino awor mester kana su kaminada. Den e kuadro aki miembronan di Staten i Kamer, por hasi uso di e posibilidatnan parlamentario, ku e trayekto di lei ta ofrese.

Den e proseso aki di tratamentu di lei, e frakshonnan por entrega moshon i amendementunan.

Finalmente kada frakshon por determina su punto di bista tokante dje proposishon di lei. Ta boga pa laga e diskushonnan plenario tokante proposishon di lei, tuma lugá promé ku e IPKO ku ta planeá pa tuma lugá na juni 2019.

E delegashon arubano ta konstatá ku despues di 8 aña, a entrega proposishon di lei pa Areglo di konsulta, dia 29 di november 2018 na Tweede Kamer. Saliendo for di e amandamentu Wever-Thijssen di 2010 (32 213, nr. 17), e delegashon arubano lo prepara su mes riba e prosedura formal di tratamentu.

E delegashon tin hopi konfiansa den un bon koperashon entre dje kuater paisnan, ku e meta pa realisa un Areglo di Desputa, ku tur hende por bai di akuerdo kune.

Pena la bida e buska e muhé

Lluengelo Koeks a bati su kasá pa mata i kastigu di prison ta kologá riba su kabes

WILLEMSTAD. E suidadano Lluengelo Koeks a pasa momentonan difísil den sala di korte ayera na momento ku wes señora mr. G. Edelenbos a konfront'é ku e forma teribel ku ela maltratá su señora.

No djis un wanta òf un simpel sla, sino un andanada di gòlpi i slanan duru el a propiná e señora ku e tabata kasá kuné.

Wes a sigui enfatisá e parti aki durante tratamentu di e kaso, kreando e impreshon ku intenshonalmente e maltrato a tuma lugá dia 18 di òktober aña pasá.

Finalmente no a keda Lluengelo Koeks nada otro sino rekonosé su kulpa den e akto kastigabel aki. E akusado Lluengelo Koeks ta tata di yu ku e tin ku e señora.

Abogado mr. Engels a sali na defensa di su kliente, pero fiskal mr. C. Janssen a insistí ku loke Lluengelo Koeks a hasi a pasa tur límite di toleransia, ya ku e tabata

kompletamente robes.

Un kuadro di aktonan desproporshonal ta loke fiskal a pinta, pa kua na final e demanda di un kastigu di prison kondishonal di 365 dia, kitando e dianan ku el a pasa kaba den aresto preventivo.

Lluengelo Koeks pa loke el a hasi a keda será den prison na Koraal Specht pa 23 dia pero wes a preferá pa no mand'é prison atrobe pero sí ta bini aserka un kastigu di trabou di 240 ora ku e mester ehersé, ku ta netamente e kategoria máksimo pa kastigunan di trabou.

Wes den e sentensia ayera a prohibí Lluengelo Koeks pa pasa na kas i òf den e kaya kaminda e señora ta biba, anto ademas e mester keda den kontakto ku Reclasering i sigui instrukshonnan di e instansia aki.

Den kaso ku e ke bini den kontakto pa mira e yunan, preferiblemente laga tur paso kana via di Reclasering.

Pa drecha aeropuerto destrosa pa orkan:

St. Maarten a baha kabes i asepta yudansa di Schiphol



PHILIPSBURG – Gobièrnu di Sint Maarten finalmente a disidi pa bai di akuerdo ku partisipashon di Royal Schiphol Group den rekonstrukshon di Princess Juliana Airport.

Durante di dos luna largu e kabinete Romeo-Marlin a tene porta duru será. Minister Stuart Johnson a papia di un 'trapaso enemistoso'.

E partisipashon di Schiphol na rekonstrukshon di e aeropuerto destrosá dor di Orkan Irma, ta un kondishon di Hulanda i Banko Mundial pa un donashon di 50 mion dollar pa e rekonsrukshon.

E Banko Oropo di Invershon, banda di esei, kontra di

kondishonnan faborabel, ta duna un krédito di 50 mion dollar.

Gobièrnu di Sint Maarten a ignorá e oferta aki i a laga sa ku e ta bai buska otro finansiadónan.

Djaluna sekretario di estado, Knops di Relashonnan di Reino a pone preshon, durante di su bishita relámpago na Philipsburg dor di usa palabranan fuerte pa insisti pa tuma un desishon rápidamente.

Un dia despues konseho di minister a baha kabes. Dos eksperto ku Schiphol lo nombra, ta bai forma parti di e maneho di e aeropuerto ku e tarea pa trese òrdu den e kalidat di e maneho i tambe e organisashon interno. Gobièrnu ta pone si un limite di 2 aña pa presensia dje ekspertonan aki.



"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa".
Salmo: 23

Nos ta anuncia fayecimiento di:



Alberto Croes

*18-09-1927 - †11-01-2019

Na nomber di su:
Esposa:
Eda Croes-Angela

Yiunan:
Tico y Mariëta Croes
Rosie y Detty Vis

Nietanan:
Rosetty y Brian
Gregory (Orry)
Daisy-Anne

Rumannan:
†Johan y †Ervilia Croes y yiunan
†Olin y †Linda Croes y yiunan
†Charly y †Theresita Croes y yiunan
†Irma y †Fanfa Croes y yiunan
†Henita y †Carlito Croes y yiunan
†Reny y †Anna Croes y yiunan
†Efi y Nelida Croes y yiunan
†Jose y †Evarista Franken y yiunan
†Cathrien y †Chico Kock y yiunan

Swa y cuñanan:
†Reynaldo y †Betty Angela y yiunan na Canda
†Elia y †Essy Thijsen y yiu
†Sira Angela
Betty y †Aly Harms y yiunan
Edwin y Hendrika Angela y yiu
Corina y †Wadji Erasmus y yiunan
Shon Pe y Fela Angela y yiu

Bon bisña y conociman:
Malmbergh, Zara, Kock, Bikker, Lacle, Falconi

Amigo di cas: Latty y Magriet Wever

Famianan: Croes, Angela, Geerman, Vis, Lake, Franken,
Kock, Thijsen, Harms, Erasmus, Bislick

Disculpa nos cu den nos tristeza nos por a lubida un of
mas famia of persona.

Oportunidad pa condolencia: dialuna 14 di januari 2019
di 7 pa 9 pm

Ta invita pa e acto di despedida cu lo tuma lugar diamars
15 di januari 2019 na Aurora Funeral Home di 9 pa 11 di
mainta, despues cremación lo tuma lugar den seno di
famia.



"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa".
Salmo: 23

Cu inmenso tristesa, pero agradecido pa tur locual el a
significa pa nos, ta anuncia fayecimento di:

Antoni Gomez

Mihor conoci como "Toni" of "Tijn"
*09-04-1938 - †08-01-2019



Na nomber di su:
Esposa: †Teresa Gomez-Faneyte

Mama: †Elisabeth Vrolijk

Tata: †Hesus Gomez

Yiunan: †Lisbeth Gomez
Anthony Gomez

Yiunan di criansa:
Albertico y famia
Rudolf y famia
Judith y famia
†Carlota y famia
Cenon y famia
Justo y famia
Melvin y famia
Andresito y famia
Jesusito y famia

Rumannan:
†Maria, Juan y yiunan
†Sixto Gomez
†Pedro, Nina y yiunan
Dolores, Olindo y yiunan
Marcela, Shone y yiunan
Raymundo, Eve y yiunan
Angel Kock
Andres Kock y yiunan
Aliria, Willy y yiunan
Otilio,Joland y yiunan

Nieto- y nietanan, bisanieto- y bisanietanan, tanta- y
omonan, primo- y primanan,

swa- y cuñanan, iha- y ahijadonan, comer- y comper-
nan, amigo- y amiganan y conociman

Demas famia:
Gomez, Faneyte, Vrolijk, Lopez, Hoek, Marchena,
Geerman, Quandus, Arends, Paula, Centeno, Janga,
Kock, Wiersma, Peña, Peterson, Thiel, Flanegin,
Maduro, Werleman, Croes, Cicilia, Rudel, Dabian,
Dorothal, Wester, Ramos.

Ta invita pa acto di entierro cu lo tuma lugar na Royal
Funeral Home diaranson 16 di januari 2019 di 2'or pa
4'or di atardi. Despues lo sali pa Santana Centraal
Sabana Basora.

Condolencia lo tuma lugar na Royal Funeral Home
diamars 15 di januari 2019 di 7'or pa 9'or di anochi.

Disculpa nos si den nos tristesa nos por a lubida algun
famia of conocer.



Señor ta mi wardado, mi n' tin falta di nada;
Den cunucu yen di yerba berde e ta pone mi sosega.
E ta hiba mi na fuent'i awa fresco, pa mi bolbe haya forsa.
Salmo: 23

Ta anuncia fayecimento inespera di



Orlando Lindoro
Hernandez

*25 di augustus 1948
†9 di januari 2019

Na nomber di su:
Casa:
Benita Hernandez-Maduro

Yiunan:
Joanna Hernandez
Orlando Jonathan Hernandez

Nieta:
Charlenne Hernandez

Mayoran:
†Encamacion y Candida Hernandez-Krozendijk

Rumannan:
Rudolf y Juliana Hernandez-Geerman
Lilian Hernandez
†Enrique Hernandez
Nelson Hernandez
†Minerva Hernandez

Sobрино y sobrinanan:
Minerva y Patrick Kock-Hernandez y yiunan
Danilo y Geraldine Hernandez-Geerman y yiunan
Leonardo Hernandez
Ariana y Michael Koolman-Chirino, yiunan y nieto
Enrique y Josina Hernandez-Kelly y yiunan
Lisette y Karim Willemsen-Hernandez y yiunan
Marilyn y Jendrick van der Linde-Hernandez y yiunan
Audrey Cindi

Suegra: vda. Jacinta Maduro-Ras

Cuñanan:
Maria y Eddy Ridderstap-Geerman y yiunan
Marietta y Gisberto Croes-Wernet
Glenda y Ovi Croes-Maduro y yiunan
Margriet Maduro
Miriam Henriquez-Maduro

Ihanan:
Minerva Hernandez, Marilyn Hernandez, Leonardo Hernandez

Tanta y omonan, prima y primonan na Aruba, Venezuela y
Hulanda

Famianan:
Hernandez, Maduro, Thiel, Krozendijk, Vera, Torres, Erasmus,
Van Alen, Croes, Flanegin, Ras, Kock, Geerman, Kelly,
Willemsen, van der Linde, Ridderstap, Henriquez, Rijssel,
Franken.

Amigonan di cas:
Rigoberto Muñoz y famia, Jose Luis Perez y famia, Javier
Cardenas y famia

Coleganan di Orlando Auto Parts, amigonan, bisiñanan y demas
famia.

Tin oportunidad pa tuma condolencia na cas Flemingstraat 2,
dialuna 14 januari 2019 for di 7'or pa 9'or di anochi.

Ta invita pa asisti na acto di entierro cu lo tuma lugar diamars 15
di januari 2019 for di 3'or pa 4'or di atardi na misa San
Francisco na Playa después lo sali pa santana Central di
Sabana Basora.

Royal Aurora

Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa".
Salmo: 23

Cu inmenso dolor na nos curason, pero agradecido pa tur loke
el a nifica pa nos, nos ta anuncia fayecimiento inespera di mi
esposa, nos mama, abuela, ruman y tanta:

Iselia Maria Maduro-Laclé

Mi hor conoci como:
"Celia" of "Tante Chea"
*18-11-1945 - †08-01-2019



Na number di su:
Esposo: Ruben Maduro

Yiunan: Vincent Maduro y Alice Geerman
Reuben y Alaina Maduro-Janga

Nietonan stima: Xydrick, Jaydrick, Zaylan Maduro
Mescos cu nieto/a: Justin, Jillian, Joshua

Rumannan: †Jose Ramiro Laclé
Elvira Laclé

Sobrinonan: André y Carla Laclé-Mauriello y yiu
Rene Laclé, Diana Diaz y yiu
Elvin John Zara y Maritza Carreon y yiunan

Sobrinanan: Linda y Eldrick Maduro y yiunan
Jo-Ann Laclé
Evarina Zara y yiunan
Gisela y André Angela -Maduro y yiu
Paola Maduro y Jairzinho Semeleer y yiunan

Omo y tantanan: Chenco y Jane Yarzagaray-Booi y famia
Albino y Katty Yarzagaray-Boeke
Emelina Yarzagaray y famia
Chispina Frank-Yarzagaray y famia
Elsa Yarzagaray y famia
Ella y Leo Tromp-Yarzagaray y famia
Francis Yarzagaray y Jos Lutherman

Swa y cuñanan: Joan Laclé-Booi
Rebecca Maduro
Sep Maduro

Su mihor amiga (o): Carmen y Henk Russel

Su prima stima: Etty Maduro

Tur su ihanan, primo y primanan, acto primo y primanan,
compañeronan di Fundacion Ven José G. Hernandez, Grupo
Magdalena, Fundacion Kawara y Club Kibrahacha.

Demas famia: Laclé, Maduro, Booi, Croes, Yarzagaray, Franken,
Janga, Lopez, Geerman y Nurse

Nos ta pidi nos disculpa si den nos tristesa y dolor nos por a
lubida un of otro famia, amistad of conocir.

Oportunidad pa condolencia y despedida na Sitio di oración
Fundacion Ven José G. Hernandez (TL # 128), diamars 15 di
januari 2019 di 7'or pa 9'or di anochi y na Aurora Funeral Home
diaranson 16 di januari 2019 di 7'or pa 9'or di anochi.

Acto di despedida lo tuma lugar diahuebs 17 di januari 2019 di
2'or pa 4'or di atardi na Aurora Funeral Home, despues
cremación lo tuma lugar den seno familiar.

Enbes di flor of krans lo tin un box disponibel pa donación pa
Fundacion Ven José G. Hernandez.

Nos ta lamenta cu despues di entiero nos no por ricibi bishita di
condolencia na cas.

Royal Aurora

Funeral Home & Crematory

"Dios ta amor... y amor ta Dios,
maske mi no ta na e mundo aki, tur dia lo mi ta banda
di boso Curazon, mi por steuns di loke Señor ta hasi"

Cu inmenso dolor na nos curason,
nos ta participa fayecimiento di:



Eleuterio Ruperto Rafaël

Mi hor conoci como
"Techi", "Oom Te", "Pai" of Opa Techi"
20-02-1919 - †11-01-2019

Acto di entiero lo wordo anuncia despues

Royal Aurora

Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa".
Salmo: 23

Nos ta anuncia fayecimiento di:



Theo Isidro Croes

*04-04-1942 - †11-01-2019

Acto di entiero lo wordo anuncia despues.

Royal Aurora

Funeral Home & Crematory

Gradicimiento y Invitacion

Na number di Yuinan, Nieto y Nietanan, Bisa-nieto y
Bisa-nieta, y tur famia nos kier a gradici for di profundo
di nos curason na esnan cu di un of otro manera a duna
nan sosten y atención durante momentonan di
tratamento medico, fallecimiento y durante di entiero di
nos mama, wela, bisawela, tanta, y ruman stima



Agnes Croes-Rosenberg

Nos kier a gradici tur famia, amiga y amigonan, ex
-coleganan, bisinanan y conociman, y na tur esnan cu a
hasi un bishita, un yamada, manda mensahe via tur e
medionan di comunicacion, manda krans y karchi.

Nos mas sincero gradicimento,
cu Dios bendishona cada un di boso pa boso sosten y
atenshon duna na nos.

Un danki special ta bai na nurses, zaalarts,
y tur dokter di Piso B-3 di Dr. Horacio Oduber Hospital,
Dr. Waterloo, Dr., Dennert, Dr. Lacle,
huisarts Dr.
y assistent

Danki Aurora Funeral Home
pa nan atenshon y bon servicio.

Boso sosten tawata un gran consuelo pa nos.

Alaves nos kier invita tur famia,
amigo y conociman pa tres santo sacrificio di misa na
misa Santa Filomena na Paradera dianan:
Dialuna, 14 di Januari 2019, 7:00PM
Diahuebs, 17 di Januari 2019, 7:00PM
Diasabra, 19 di Januari 2019, 7:00PM

Boso presencia lo ta altamente aprecia.

When you go
through deep waters,
I WILL BE WITH YOU.
ISAIAH 43:2



E unico corant GRATIS



Abona awo

Manda un e-mail na:

Noticia@awemainta.com

y skirbi e palabranan: *"Ami Kier Abona"*

Like nos riba facebook

Keda "up to date" y like nos riba facebook
www.facebook.com/awemainta



Subi riba nos website

www.awemainta.com

AWEMainta completamente

DIGITAL